



Comhairle an
Aontais Eorpaigh

An Bhruiséil, 3 Meitheamh 2025
(OR. en)

9718/25
ADD 1

Comhad Idirinstitiúideach:
2025/0136(NLE)

TELECOM 176
CYBER 153

TOGRA

ó:	Ardrúnaí an Choimisiúin Eorpaigh, arna s(h)íniú ag Martine DEPREZ, Stiúrthóir
dáta a fuarthas:	3 Meitheamh 2025
chuig:	Thérèse BLANCHET, Ardrúnaí Chomhairle an Aontais Eorpaigh
Uimh. an doic. ón gCoim.:	COM(2025) 265 final
Ábhar:	IARSCRÍBHINNÍ a ghabhann leis an Togra le haghaidh Cinneadh ón gComhairle maidir le tabhairt i gcrích, thar ceann an Aontais Eorpaigh, Chreat- Choinbhinsiún Chomhairle na hEorpa maidir leis an Intleacht Shaorga, Ceartha an Duine, an Daonlathas agus an Smacht Reachta

Gheobhaidh na toscaireachtaí i gceangal leis seo doiciméad COM(2025) 265 final.

Faoi iamh: COM(2025) 265 final



AN COIMISIÚN
EORPACH

An Bhruiséil, 3.6.2025
COM(2025) 265 final

ANNEXES 1 to 2

IARSCRÍBHINNÍ

a ghabhann leis an

Togra le haghaidh Cinneadh ón gComhairle

**maidir le tabhairt i gcrích, thar ceann an Aontais Eorpaigh, Chreat-Choinbhinsiún
Chomhairle na hEorpa maidir leis an Intleacht Shaorga, Cearta an Duine, an
Daonlathas agus an Smacht Reachta**

IARSCRÍBHINN I

TÉACS CHREAT-CHOINBHINSIÚN CHOMHAIRLE NA hEORPA MAIDIR LEIS AN INTLEACHT SHAORGA, CEARTA AN DUINE, AN DAONLATHAS AGUS AN SMACHT REACHTA

Vilnias, 5.IX.2024

Brollach

Tá Ballstáit Chomhairle na hEorpa agus na sínitheoirí eile a ghabhann leis seo,

Ós rud é go bhfuil sé d'aidhm ag Comhairle na hEorpa aontacht níos mó a bhaint amach i measc a Ballstát, bunaithe go háirithe ar urramú chearta an duine, an daonlathais agus an smachta reatha;

Ag aithint dóibh an luach a bhaineann le comhar idir na Páirtithe sa Choinbhinsiún seo agus leis an gcomhar sin a leathnú go Stáit eile a bhfuil na luachanna céanna acu;

Ós feasach dóibh go bhfuil dlús á chur leis na forbairtí san eolaíocht agus sa teicneolaíocht agus na hathruithe ó bhonn a dhéantar le gníomhaíochtaí laistigh de shaolré na gcóras intleachta saorga, ar féidir leo rathúnas an duine a chur chun cinn chomh maith le folláine an duine aonair agus na sochaí, an fhorbairt inbhuanaithe, comhionannas inscne agus cumhachtú na mban agus na gcailíní uile, mar aon le spriocanna agus leasanna tábhachtacha eile, tríd an dul chun cinn agus an nuálaíocht a fheabhsú;

Ag aithint dóibh go bhféadfaí, le gníomhaíochtaí laistigh de shaolré na gcóras intleachta saorga, deiseanna nach bhfacthas a leithéid riamh roimhe seo a chur ar fáil chun cearta an duine, an daonlathas agus an smacht reachta a chosaint agus a chur chun cinn;

Ós díol inní dóibh go bhféadfaí, le gníomhaíochtaí laistigh de shaolré na gcóras intleachta saorga, dochar a dhéanamh do dhínit an duine, an neamhspleáchas aonair, cearta an duine, an daonlathas agus an smacht reachta;

Ós díol inní dóibh na rioscaí idirdhealaithe i gcomhthéacsanna digiteacha, go háirithe na comhthéacsanna sin a bhaineann le córais intleachta saorga, agus an éifeacht a d'fhéadfadh a bheith acu neamhionannais a chruthú nó a ghéarú, lena n-áirítear na neamhionannais sin a bhíonn ag mná agus ag daoine aonair i gcásanna leochaileacha, maidir le tairbhiú a gceart daonna agus maidir lena rannpháirtíocht iomlán, chomhionann agus éifeachtach i ngnóthaí eacnamaíocha, sóisialta, cultúrtha agus polaitiúla;

Ós díol inní dóibh mí-úsáid córas intleachta saorga agus go bhfuil siad i gcoinne úsáid na gcóras sin chun críoch diansmachta de shárú ar an dlí idirnáisiúnta um chearta an duine, lena n-áirítear trí fhaireachas treallach nó neamhdhleathach agus cleachtais chinsireachta lena gcreimtear príobháideacht agus neamhspleáchas aonair;

Ós feasach dóibh go bhfuil cearta an duine, an daonlathas agus an smacht reachta fite fuaite ina chéile go bunúsach;

Ós deimhin leo gur gá creat dlíthiúil is infheidhme ar fud an domhain a bhunú, mar ábhar tosaíochta, lena leagfar amach prionsabail agus rialacha ginearálta coiteanna lena rialaítear na gníomhaíochtaí laistigh de shaolré na gcóras intleachta saorga lena gcaomhnaítear go héifeachtach luachanna comhroinnte agus lena mbaintear leas as tairbhí na hintleachta saorga chun na luachanna sin a chur chun cinn ar bhealach a chuidíonn leis an nuálaíocht fhreagrach;

Ag aithint dóibh gur gá litearthacht dhigiteach a chur chun cinn mar aon le heolas faoi dhearadh, forbairt, úsáid agus díchoimisiúnú na gcóras intleachta saorga agus muinín as na nithe sin;

Ag aithint dóibh cineál creata an Choinbhinsiúin seo, a fhéadfar a fhorlíonadh le hionstraimí breise chun aghaidh a thabhairt ar shaincheisteanna sonracha a bhaineann le gníomhaíochtaí laistigh de shaolré na gcóras intleachta saorga;

Ag cur i dtábhacht dóibh go bhfuil sé beartaithe leis an gCoinbhinsiún seo aghaidh a thabhairt ar dhúshláin shonracha a eascraíonn le linn shaolré na gcóras intleachta saorga, agus breithniú a spreagadh ar na rioscaí agus na tionchair níos leithne a bhaineann leis na teicneolaíochtaí sin, lena n-áirítear, ach gan bheith teoranta dóibh, sláinte an duine agus an comhshaol, agus gnéithe socheacnamaíocha, amhail fostaíocht agus saothar;

Ag tabhairt dá n-aire dóibh na hiarrachtaí ábhartha atá á ndéanamh ag eagraíochtaí agus fóraim idirnáisiúnta agus fhornáisiúnta eile chun an tuiscint agus an comhar idirnáisiúnta maidir leis an intleacht shaorga a chur chun cinn;

Agus aird á tabhairt acu ar na hionstraimí idirnáisiúnta is infheidhme maidir le cearta an duine, amhail Dearbhú Uilechoiteann Chearta an Duine 1948, Coinbhinsiún um Chearta an Duine agus Saoirsí Bunúsacha a Chosaint 1950 (ETS Uimh. 5), an Cúnant Idirnáisiúnta ar Chearta Sibhialta agus Polaitiúla 1966, an Cúnant Idirnáisiúnta maidir le Cearta Eacnamaíocha, Sóisialta agus Cultúrtha 1966, Cairt Shóisialta na hEorpa 1961 (ETS Uimh. 35), chomh maith lena bprótacail féin, agus Cairt Shóisialta na hEorpa 1996 (athbhreithnithe) (ETS Uimh. 163);

Agus aird á tabhairt acu freisin ar Choinbhinsiún na Náisiún Aontaithe um Chearta an Linbh 1989 agus Coinbhinsiún na Náisiún Aontaithe ar Chearta Daoine faoi Mhíchumas 2006;

Agus aird á tabhairt acu freisin ar chearta príobháideachais daoine aonair agus ar chosaint sonraí pearsanta, de réir mar is infheidhme agus mar a thugtar, mar shampla, le Coinbhinsiún 1981 chun Daoine Aonair a Chosaint maidir le Sonraí Pearsanta a Phróiseáil go hUathoibríoch (ETS Uimh. 108) agus na prótacail a ghabhann leis;

Ag dearbhú dóibh tiomantas na bPáirtithe cearta an duine, an daonlathas agus an smacht reachta a chosaint, agus iontaofacht na gcóras intleachta saorga a chothú tríd an gCoinbhinsiún seo,

Tar éis an méid seo a leanas a chomhaontú:

Caibidil I – Forálacha ginearálta

Airteagal 1 — Cuspóir agus críoch

- (1) Is é is aidhm d'fhorálacha an Choinbhinsiúin seo a áirithiú go bhfuil gníomhaíochtaí laistigh de shaolré na gcóras intleachta saorga iomlán comhsheasmhach le cearta an duine, an daonlathas agus an smacht reachta.
- (2) Glacfaidh gach Páirtí bearta iomchuí reachtacha, riaracháin nó eile nó coinneoidh sé ar bun iad chun éifeacht a thabhairt do na forálacha a leagtar amach sa Choinbhinsiún seo. Céimneofar na bearta sin agus déanfar iad a dhifreáil de réir mar is gá i bhfianaise dhéine agus dhóchúlacht tharlú na n-iarmhairtí díobhálacha ar chearta an duine, an daonlathas agus an smacht reachta ar feadh shaolré na gcóras intleachta saorga. D'fhéadfaí a áireamh leis sin bearta sonracha nó cothrománacha a mbeadh feidhm acu gan beann ar an gcineál teicneolaíochta a úsáidtear.

- (3) Chun a áirithiú go gcuirfidh na Páirtithe forálacha an Choinbhinsiúin chun feidhme go héifeachtach, bunaítear leis an gCoinbhinsiún seo sásra leantach agus déantar foráil maidir le comhar idirnáisiúnta.

Airteagal 2 — Sainmhíniú ar chórais intleachta saorga

Chun críocha an Choinbhinsiúin seo, ciallaíonn ‘córas intleachta saorga’ córas meaisínbhunaithe, le haghaidh cuspóirí sainráite nó intuigthe, lena dtugtar le tuiscint, leis an ionchur a fhaigheann sé, conas aschuir a ghiniúint amhail tuartha, ábhar, moltaí nó cinntí a d’fhéadfadh tionchar a imirt ar thimpeallachtaí fisiciúla nó fíorúla. D’fhéadfadh córais intleachta saorga a bheith éagsúil maidir lena leibhéal neamhspleáchais agus oiriúnaitheachta tar éis a gcur in úsáid.

Airteagal 3 — Raon Feidhme

- (1) Cumhdaíonn raon feidhme an Choinbhinsiúin seo gníomhaíochtaí laistigh de shaolré na gcórais intleachta saorga a d’fhéadfadh cur isteach ar chearta an duine, an daonlathas agus an smacht reachta mar a leanas:

- (a) Cuirfidh gach Páirtí an Coinbhinsiúin seo i bhfeidhm maidir leis na gníomhaíochtaí laistigh de shaolré na gcórais intleachta saorga a ghabhann údarais phoiblí orthu féin nó gníomhaithe príobháideacha ag gníomhú thar a gceann.
- (b) Tabharfaidh gach Páirtí aghaidh ar rioscaí agus tionchair a eascraíonn as gníomhaíochtaí laistigh de shaolré na gcórais intleachta saorga a dhéanann gníomhaithe príobháideacha a mhéid nach gcumhdaítear i bhfomhír ar bhealach atá i gcomhréir le cuspóir agus críoch an Choinbhinsiúin seo.

Sonróidh gach Páirtí i ndearbhú a chuirfear faoi bhráid Ardrúnaí Chomhairle na hEorpa tráth an tsínithe nó tráth a thaiscfear a ionstraim dhaingniúcháin, ghlactha, formheasa nó aontachais, an chaoi a bhfuil sé beartaithe aige an oibleagáid sin a chur chun feidhme, trí na prionsabail agus na hoibleagáidí a leagtar amach i gCaibidlí II go VI den Choinbhinsiún seo a chur i bhfeidhm maidir le gníomhaíochtaí gníomhaithe príobháideacha nó trí bhearta iomchuí eile a dhéanamh chun an oibleagáid a leagtar amach san fhomhír seo a chomhlíonadh. Féadfaidh na páirtithe, tráth ar bith agus ar an mbealach céanna, a ndearbhuithe a leasú.

Agus an oibleagáid faoin bhfomhír seo á cur chun feidhme ag Páirtí, ní fhéadfaidh sé maolú ar chur i bhfeidhm na n-oibleagáidí idirnáisiúnta a ghabh sé air féin chun cearta an duine, an daonlathas agus an smacht reachta a chosaint, ná ní fhéadfaidh sé cur i bhfeidhm na n-oibleagáidí sin a theorannú.

- (2) Ní cheanglófar ar Pháirtí an Coinbhinsiúin seo a chur i bhfeidhm maidir le gníomhaíochtaí laistigh de shaolré na gcórais intleachta saorga a bhaineann lena leasanna slándála náisiúnta a chosaint, ar an tuiscint go ndéantar na gníomhaíochtaí sin ar bhealach atá comhsheasmhach leis an dlí idirnáisiúnta is infheidhme, lena n-áirítear oibleagáidí an dlí idirnáisiúnta um chearta an duine, agus le hurraim dá institiúidí daonlathacha agus dá phróisis dhaonlathacha.
- (3) Gan dochar d’Airteagal 13 agus d’Airteagal 25, mír 2, ní bheidh feidhm ag an gCoinbhinsiún seo maidir le gníomhaíochtaí taighde agus forbartha a bhaineann le córais intleachta saorga nár cuireadh ar fáil fós lena n-úsáid, ach amháin má dhéantar

tástáil nó gníomhaíochtaí comhchosúla ar bhealach a d'fhéadfadh cur isteach ar chearta an duine, an daonlathas agus an smacht reachta.

- (4) Ní thagann ábhair a bhaineann le cosaint náisiúnta faoi raon feidhme an Choinbhinsiúin seo.

Caibidil II — Oibleagáidí ginearálta

Airteagal 4 — Cearta an duine a chosaint

Déanfaidh gach Páirtí bearta a ghlacadh nó a choinneáil ar bun chun a áirithiú go mbeidh na gníomhaíochtaí laistigh de shaolré na gcóras intleachta saorga comhsheasmhach leis na hoibleagáidí chun cearta an duine a chosaint, mar a chumhdaítear sa dlí idirnáisiúnta is infheidhme agus ina dhlí náisiúnta.

Airteagal 5 — Sláine na bpróiseas daonlathach agus urraim don smacht reachta

- (1) Déanfaidh gach Páirtí bearta a ghlacadh nó a choinneáil ar bun lena bhféachtar lena áirithiú nach n-úsáidfear córais intleachta saorga chun dochar a dhéanamh do shláine, neamhspleáchas agus éifeachtacht institiúidí daonlathacha agus próiseas daonlathach, lena n-áirítear prionsabal scaradh na gcumhachtaí, urraim do neamhspleáchas breithiúnach agus rochtain ar cheartas.
- (2) Déanfaidh gach Páirtí bearta a ghlacadh nó a choinneáil ar bun lena bhféachtar lena phróisis dhaonlathacha a chosaint i gcomhthéacs gníomhaíochtaí laistigh de shaolré na gcóras intleachta saorga, lena n-áirítear rochtain chothrom daoine aonair ar dhíospóireacht phoiblí agus a rannpháirtíocht inti, chomh maith lena gcumas tuairimí a cheapadh gan srian.

Caibidil III — Prionsabail a bhaineann le gníomhaíochtaí laistigh de shaolré na gcóras intleachta saorga

Airteagal 6 — Cur chuige ginearálta

Leagtar amach sa chaibidil seo prionsabail choiteanna ghinearálta a chuirfidh gach Páirtí chun feidhme maidir le córais intleachta saorga ar bhealach is iomchuí dá chóras dlí náisiúnta agus d'oibleagáidí eile an Choinbhinsiúin seo.

Airteagal 7 — Dínit an duine agus neamhspleáchas aonair

Déanfaidh gach Páirtí bearta a ghlacadh nó a choinneáil ar bun chun dínit an duine agus neamhspleáchas aonair a urramú i ndáil le gníomhaíochtaí laistigh de shaolré na gcóras intleachta saorga.

Airteagal 8 — Trédhearcacht agus formhaoirseacht

Déanfaidh gach Páirtí bearta a ghlacadh nó a choinneáil ar bun chun a áirithiú go mbeidh ceanglais trédhearcachta agus formhaoirseachta leormhaithe atá saincheaptha do na comhthéacsanna agus na rioscaí sonracha curtha i bhfeidhm i leith gníomhaíochtaí laistigh de shaolré na gcóras intleachta saorga, lena n-áirítear maidir le hinneachar arna ghiniúint ag córais intleachta saorga a shainaithint.

Airteagal 9 — Cuntasacht agus freagracht

Déanfaidh gach Páirtí bearta a ghlacadh nó a choinneáil ar bun chun cuntasacht agus freagracht a áirithiú maidir le drochthionchair ar chearta an duine, an daonlathas agus an smacht reachta a eascraíonn as gníomhaíochtaí laistigh de shaolré na gcóras intleachta saorga.

Airteagal 10 — An comhionannas agus an neamh-idirdhealú

- (1) Déanfaidh gach Páirtí bearta a ghlacadh nó a choinneáil ar bun d'fhonn a áirithiú go n-urramófar le gníomhaíochtaí laistigh de shaolré na gcóras intleachta saorga an comhionannas, lena n-áirítear an comhionannas inscne, agus an toirmeasc ar idirdhealú, dá bhforáiltear faoin dlí idirnáisiúnta agus náisiúnta is infheidhme.
- (2) Gabhann gach Páirtí air féin bearta a ghlacadh nó a choinneáil ar bun arb é is aidhm dóibh neamhionannais a shárú chun torthaí córa, cothroma agus comhionanna a bhaint amach, i gcomhréir lena oibleagáidí náisiúnta agus idirnáisiúnta is infheidhme maidir le cearta an duine, i ndáil le gníomhaíochtaí laistigh de shaolré na gcóras intleachta saorga.

Airteagal 11 — Príobháideacht agus sonraí pearsanta a chosaint

Déanfaidh gach Páirtí bearta a ghlacadh nó a choinneáil ar bun chun an méid seo a leanas a áirithiú maidir le gníomhaíochtaí laistigh de shaolré na gcóras intleachta saorga:

- (a) go gcosnaítear cearta príobháideachais daoine aonair agus a gcuid sonraí pearsanta, lena n-áirítear trí dhlíthe, caighdeáin agus creataí náisiúnta agus idirnáisiúnta is infheidhme; agus
- (b) go bhfuil ráthaíochtaí agus coimircí éifeachtacha curtha i bhfeidhm le haghaidh daoine aonair, i gcomhréir leis na hoibleagáidí dlíthiúla náisiúnta agus idirnáisiúnta is infheidhme.

Airteagal 12 — Iontaofacht

Déanfaidh gach Páirtí, de réir mar is iomchuí, bearta chun iontaofacht córas intleachta saorga agus muinín as a n-aschuir a chur chun cinn, lena bhféadfaí ceanglais a áireamh a bhaineann le cáilíocht agus slándáil leormhaith ar feadh shaolré na gcóras intleachta saorga.

Airteagal 13 — Nuálaíocht shábháilte

D'fhonn nuálaíocht a chothú agus, san am céanna, drochthionchair ar chearta an duine, an daonlathas agus an smacht reachta a sheachaint, iarrtar ar gach Páirtí bunú timpeallachtaí rialaithe a chumasú, de réir mar is iomchuí, chun córais intleachta saorga a fhorbairt, a thriail agus a thástáil faoi mhaoirseacht a údarás inniúil.

Caibidil IV — Leigheasanna

Airteagal 14 — Leigheasanna

- (1) Déanfaidh gach Páirtí, a mhéid a éilítear leigheasanna lena oibleagáidí idirnáisiúnta agus atá comhsheasmhach lena chóras dlí náisiúnta, bearta a ghlacadh nó a choinneáil ar bun chun a áirithiú go mbeidh leigheasanna inrochtana agus éifeachtacha ar fáil ar sháruithe ar chearta an duine a eascraíonn as gníomhaíochtaí laistigh de shaolré na gcóras intleachta saorga.

- (2) D'fhonn tacú le mír 1 thuas, déanfaidh gach Páirtí bearta a ghlacadh nó a choinneáil ar bun lena n-áirítear an méid seo a leanas:
- (a) bearta chun a áirithiú go ndéanfar faisnéis ábhartha maidir le córais intleachta saorga a d'fhéadfadh difear suntasach a dhéanamh do chearta an duine agus a n-úsáid ábhartha a dhoiciméadú, a sholáthar do chomhlachtaí atá údaraithe chun rochtain a fháil ar an bhfaisnéis sin agus, i gcás inarb iomchuí agus inarb infheidhme, a chur ar fáil nó a chur in iúl do na daoine dá ndéantar difear;
 - (b) bearta chun a áirithiú gur leordhóthanach an fhaisnéis dá dtagraítear i bhfomhír a chun gur féidir leis na daoine dá ndéantar difear na cinntí a rinneadh a chonspóid, nó go gcuirtear ar an eolas go substaintiúil iad trí úsáid an chórais, agus, i gcás inarb ábhartha agus inarb iomchuí, úsáid an chórais féin; agus
 - (c) deis éifeachtach le haghaidh na ndaoine lena mbaineann gearán a thaisceadh leis na húdaráis inniúla.

Airteagal 15 — Coimircí nós imeachta

- (1) Áiritheoidh gach Páirtí, i gcás ina mbeidh tionchar mór ag córas intleachta saorga ar thairbhiú chearta an duine, go mbeidh ráthaíochtaí, coimircí agus cearta nós imeachta éifeachtacha ar fáil do dhaoine a ndéanann an córas sin difear dóibh, i gcomhréir leis an dlí idirnáisiúnta agus náisiúnta is infheidhme.
- (2) Féachfaidh gach Páirtí lena áirithiú, de réir mar is iomchuí don chomhthéacs, go dtabharfar fógra do dhaoine a bhíonn ag idirghníomhú le córais intleachta saorga go bhfuil siad ag idirghníomhú leis na córais sin seachas le duine.

Caibidil V — Measúnú agus maolú rioscaí agus drochthionchar

Airteagal 16 — Creat bainistithe rioscaí agus tionchar

- (1) Déanfaidh gach Páirtí, agus na prionsabail a leagtar amach i gCaibidil III á gcur san áireamh, bearta a ghlacadh nó a choinneáil ar bun chun na rioscaí a bhaineann le córais intleachta saorga a shainaithint, a mheasúnú, a chosc agus a mhaolú trí thionchair iarbhir agus fhéideartha ar chearta an duine, an daonlathas agus an smacht reachta a chur san áireamh.
- (2) Céimneofar na bearta sin agus déanfar iad a dhifreáil, de réir mar is gá, agus:
 - (a) tabharfar aird chuí leo ar chomhthéacs agus ar úsáid bheartaithe na gcórais intleachta saorga, go háirithe maidir le rioscaí do chearta an duine, an daonlathas agus an smacht reachta;
 - (b) tabharfar aird chuí leo ar dhéine agus ar dhóchúlacht na dtionchair féideartha;
 - (c) cuirfear san áireamh leo, i gcás inarb iomchuí, peirspictíochtaí na bpáirtithe leasmhara ábhartha, go háirithe daoine a bhféadfadh tionchar a bheith ar a gcearta;
 - (d) beidh feidhm leo go hatriallach ar feadh na ngníomhaíochtaí laistigh de shaolré an chórais intleachta saorga;
 - (e) áireofar leo faireachán le haghaidh rioscaí agus drochthionchar ar chearta an duine, an daonlathas agus an smacht reachta;
 - (f) áireofar leo doiciméadú ar rioscaí, tionchair iarbhir agus ionchasacha, agus an cur chuige bainistithe riosca; agus

- (g) ceanglófar leo, i gcás inarb iomchuí, go ndéanfar córais intleachta saorga a thástáil sula gcuirfear ar fáil don chéad úsáid iad agus nuair a mhodhnófar go suntasach iad;
- (3) Déanfaidh gach Páirtí bearta a ghlacadh nó a choinneáil ar bun lena bhféachtar lena áirithiú go dtabharfar aghaidh go leormhaith ar dhrochthionchair na gcórais intleachta saorga ar chearta an duine, an daonlathas agus an smacht reachta. Na drochthionchair sin agus na bearta sin chun aghaidh a thabhairt orthu, ba cheart iad a dhoiciméadú agus bonn eolais a chur faoi na bearta bainistithe riosca ábhartha a dtugtar tuairisc orthu i mír 2.
- (4) Déanfaidh gach Páirtí measúnú ar an ngá atá le moratóir nó toirmeasc nó bearta iomchuí eile i leith úsáidí áirithe córais intleachta saorga i gcás ina measfaidh sé go bhfuil na húsáidí sin ar neamhréir leis an urraim do chearta an duine, feidhmiú an daonlathais nó an smacht reachta.

Caibidil VI — Cur chun feidhme an Choinbhinsiúin

Airteagal 17 — Neamh-idirdhealú

Déanfar cur chun feidhme fhorálacha an Choinbhinsiúin seo ag na Páirtithe a áirithiú gan idirdhealú ar aon fhoras, i gcomhréir lena n-oibleagáidí idirnáisiúnta maidir le cearta an duine.

Airteagal 18 — Cearta daoine faoi mhíchumas agus leanaí

Déanfaidh gach Páirtí, i gcomhréir lena dhlí náisiúnta agus leis na hoibleagáidí idirnáisiúnta is infheidhme, aird chuí a thabhairt ar aon riachtanas agus leochaileacht shonrach i ndáil le cearta daoine faoi mhíchumas agus leanaí a urramú.

Airteagal 19 — Comhairliúchán poiblí

Féachfaidh gach Páirtí lena áirithiú go ndéanfar ceisteanna tábhachtacha a ardaítear i ndáil le córais intleachta saorga a bhreithniú go cuí, de réir mar is iomchuí, trí chomhairliúchán ilpháirtithe leasmhara i bhfianaise na n-impleachtaí sóisialta, eacnamaíocha, dlíthiúla, eiticíúla, comhshaoil agus impleachtaí ábhartha eile.

Airteagal 20 — An litearthacht dhigiteach agus scileanna digiteacha

Déanfaidh gach Páirtí an litearthacht dhigiteach agus scileanna digiteacha leormhaithe a spreagadh agus a chur chun cinn le haghaidh gach cuid den daonra, lena n-áirítear sainscileanna sonracha lena n-aghaidh siúd atá freagrach as na rioscaí a bhaineann le córais intleachta saorga a shainaithint, a mheasúnú, a chosc agus a mhaolú.

Airteagal 21 — Coimirce le haghaidh chearta an duine atá ann cheana

Ní fhorléireofar aon ní sa Choinbhinsiún seo mar ní a chuireann teorainn le cearta an duine ná le cearta agus oibleagáidí dlíthiúla gaolmhara eile, ná a mhaolaíonn orthu nó a dhéanann difear dóibh ar shlí eile, cearta agus oibleagáidí dlíthiúla a d'fhéadfaí a ráthú faoi dhlíthe ábhartha Páirtí nó faoi aon chomhaontú idirnáisiúnta ábhartha eile ar Páirtí ann é.

Airteagal 22 — Cosaint níos leithne

Ní léirmhíneofar aon fhoráil den Choinbhinsiún seo mar fhoráil lena dteorannaítear ná lena ndéantar difear ar shlí eile don fhéidearthacht atá ag Páirtí beart cosanta níos leithne a dheonú ná mar a shonraítear sa Choinbhinsiún seo.

Caibidil VII — Sásra leantach agus comhar

Airteagal 23 — Comhdháil na bPáirtithe

- (1) Is éard a bheidh i gComhdháil na bPáirtithe ionadaithe de chuid na bpáirtithe sa Choinbhinsiún seo.
- (2) Rachaidh na Páirtithe i gcomhar le chéile go tréimhsiúil d'fhonn an mhéid seo a leanas a dhéanamh:
 - a. cur i bhfeidhm agus cur chun feidhme éifeachtach an Choinbhinsiúin seo a éascú, lena n-áirítear aon fhadhb a shainaithint agus éifeachtaí aon fhorchoimeádais a dhéanfar de bhun Airteagal 34, mír 1, nó aon dearbhaithe a dhéanfar faoin gCoinbhinsiún seo;
 - b. breithniú ar an bhféidearthacht an Choinbhinsiúin seo a fhorlíonadh nó a leasú;
 - c. ábhair a bhreithniú agus moltaí sonracha a dhéanamh maidir le léirmhíniú agus cur i bhfeidhm an Choinbhinsiúin seo;
 - d. malartú faisnéise a éascú maidir le forbairtí suntasacha dlíthiúla, beartais nó teicneolaíocha ábhartha, lena n-áirítear chun na cuspóirí a shainítear in Airteagal 25 a shaothrú, chun an Choinbhinsiún seo a chur chun feidhme;
 - e. réiteach dea-mhéiniúil a éascú, i gcás inar gá, maidir le díospóidí a bhaineann le cur i bhfeidhm an Choinbhinsiúin seo; agus
 - f. comhar a éascú le páirtithe leasmhara ábhartha maidir le gnéithe ábhartha de chur chun feidhme an Choinbhinsiúin seo, lena n-áirítear trí éisteachtaí poiblí i gcás inarb iomchuí.
- (3) Is é Ardrúnaí Chomhairle na hEorpa a dhéanfaidh Comhdháil na bPáirtithe a chomóradh aon uair is gá agus, in aon chás, nuair a iarrfaidh tromlach na bPáirtithe nó an Coiste Airí í a chomhghairm.
- (4) Glacfaidh Comhdháil na bPáirtithe a rialacha nós imeachta féin de chomhthoil laistigh de 12 mhí ó theacht i bhfeidhm an Choinbhinsiúin seo.
- (5) Tabharfaidh Rúnaíocht Chomhairle na hEorpa cúnamh do na Páirtithe a bhfeidhmeanna de bhun an Airteagail seo a chomhlíonadh.
- (6) Féadfaidh Comhdháil na bPáirtithe bealaí iomchuí a mholadh don Choiste Airí chun leas a bhaint as saineolas ábhartha chun tacú le cur chun feidhme éifeachtach an Choinbhinsiúin seo.
- (7) Aon Pháirtí nach Ballstát de Chomhairle na hEorpa é, ranníocfaidh sé le maoiniú ghníomhaíochtaí Comhdháil na bPáirtithe. Déanfaidh an Coiste Airí agus an Páirtí nach Ballstát de Chomhairle na hEorpa é ranníocaíocht an Pháirtí nach Ballstát é a bhunú go comhpháirteach.
- (8) Féadfaidh Comhdháil na bPáirtithe a chinneadh srian a chur le rannpháirtíocht Páirtí ina cuid oibre, ar Páirtí é nach Ballstát de Chomhairle na hEorpa a thuilleadh faoi Airteagal 8 de Reacht Chomhairle na hEorpa (ETS Uimh. 1) i gcás sárú

tromchúiseach ar Airteagal 3 den Reacht. Ar an gcaoi chéanna, is féidir bearta a dhéanamh i leith aon Pháirtí nach Ballstát de Chomhairle na hEorpa é, le cinneadh ón gCoiste Airí, chun deireadh a chur lena chaidreamh leis an Stát sin ar fhorais atá comhchosúil leis na forais a luaitear in Airteagal 3 den Reacht.

Airteagal 24 — Oibleagáid tuairiscithe

- (1) Cuirfidh gach Páirtí tuarascáil ar fáil do Chomhdháil na bPáirtithe laistigh den chéad 2 bhliain tar éis dó teacht chun bheith ina Pháirtí, agus ansin go tréimhsiúil ina dhiaidh sin le mionsonraí na ngníomhaíochtaí a rinneadh chun éifeacht a thabhairt d'Airteagal 3, mír 1, fomhíreanna a agus b.
- (2) Cinnfidh Comhdháil na bPáirtithe formáid agus próiseas na tuarascála i gcomhréir lena rialacha nós imeachta.

Airteagal 25 — Comhar idirnáisiúnta

- (1) Comhoibreoidh na Páirtithe chun cuspóir an Choinbhinsiúin seo a bhaint amach. Moltar a thuilleadh do na páirtithe, de réir mar is iomchuí, cúnamh a thabhairt do Stáit nach Páirtithe sa Choinbhinsiún seo chun gníomhú go comhsheasmhach le téarmaí an Choinbhinsiúin seo agus teacht chun bheith ina bPáirtithe ann.
- (2) De réir mar is iomchuí, malartóidh na Páirtithe faisnéis ábhartha úsáideach eatarthu féin maidir le gnéithe a bhaineann leis an intleacht shaorga a bhféadfadh éifeachtaí móra dearfacha nó diúltacha a bheith acu ar thairbhiú chearta an duine, feidhmiú an daonlathais agus urramú an smachta reachta, lena n-áirítear rioscaí agus éifeachtaí a tháinig chun cinn i gcomhthéacsanna taighde agus i ndáil leis an earnáil phríobháideach. Moltar do na Páirtithe páirt a thabhairt, de réir mar is iomchuí, do pháirtithe leasmhara ábhartha agus do Stáit nach Páirtithe iad sa Choinbhinsiún seo i malartuithe faisnéise den sórt sin.
- (3) Moltar do na Páirtithe an comhar a neartú, lena n-áirítear le páirtithe leasmhara ábhartha i gcás inarb iomchuí, chun rioscaí agus drochthionchair ar chearta an duine, an daonlathas agus an smacht reachta a chosc agus a mhaolú i gcomhthéacs gníomhaíochtaí laistigh de shaolré na gcóras intleachta saorga.

Airteagal 26 — Sásraí formhaoirseachta éifeachtacha

- (1) Déanfaidh gach Páirtí sásra éifeachtach amháin nó níos mó a bhunú nó a ainmniú chun formhaoirseacht a dhéanamh ar chomhlíonadh na n-oibleagáidí sa Choinbhinsiún seo.
- (2) Áiritheoidh gach Páirtí go bhfeidhmeoidh na sásraí sin a ndualgais go neamhspleách agus go neamhchlaonta agus go mbeidh na cumhachtaí, an saineolas agus na hacmhainní is gá acu chun a gcúraimí a chomhlíonadh go héifeachtach maidir le formhaoirseacht a dhéanamh ar chomhlíonadh na n-oibleagáidí sa Choinbhinsiún seo, de réir mar a thugann na Páirtithe éifeacht dóibh.
- (3) Más rud é go ndéanann Páirtí foráil maidir le níos mó ná sásra amháin den sórt sin, déanfaidh sé bearta, i gcás inarb indéanta, chun comhar éifeachtach a éascú eatarthu.
- (4) Más rud é go ndéanann Páirtí foráil maidir le sásraí atá éagsúil le struchtúir i dtaca le cearta an duine atá ann cheana, déanfaidh sé bearta, i gcás inarb indéanta, chun comhar éifeachtach a chur chun cinn idir na sásraí dá dtagraítear i mír 1 agus na struchtúir náisiúnta sin i dtaca le cearta an duine atá ann cheana.

Caibidil VIII — Clásail chríochnaitheacha

Airteagal 27 — Éifeachtaí an Choinbhinsiúin

- (1) Má tá comhaontú nó conradh tugtha i gcrích cheana féin ag dhá Pháirtí nó níos mó maidir leis na hábhair a ndéileáiltear leo sa Choinbhinsiún seo, nó má tá caidreamh bunaithe acu ar shlí eile maidir leis na hábhair sin, beidh siad i dteideal freisin an comhaontú nó an conradh sin a chur i bhfeidhm nó an caidreamh sin a rialáil dá réir sin, fad a dhéanfaidh siad amhlaidh ar bhealach nach mbeidh ar neamhréir le cuspóir agus críoch an Choinbhinsiúin seo.
- (2) Maidir leis na Páirtithe ar Ballstáit den Aontas Eorpach iad, cuirfidh siad, ina gcaidreamh frithpháirteach, rialacha an Aontais Eorpaigh chun feidhme lena rialaítear na hábhair a thagann faoi raon feidhme an Choinbhinsiúin seo gan dochar do chuspóir ná do chríoch an Choinbhinsiúin seo agus gan dochar dá chur i bhfeidhm iomlán le Páirtithe eile. Tá feidhm ag an méid sin maidir le Páirtithe eile a mhéid atá siad faoi cheangal ag na rialacha sin.

Airteagal 28 — Leasuithe

- (1) Féadfaidh aon Pháirtí, Coiste Airí Chomhairle na hEorpa nó Comhdháil na bPáirtithe leasuithe ar an gCoinbhinsiún seo a mholadh.
- (2) Cuirfidh Ardrúnaí Chomhairle na hEorpa aon togra le haghaidh leasaithe in iúl do na Páirtithe.
- (3) Aon leasú a mholfaidh Páirtí nó an Coiste Airí, cuirfear in iúl do Chomhdháil na bPáirtithe é agus cuirfidh an Chomhdháil a tuairim maidir leis an leasú atá beartaithe faoi bhráid an Choiste Airí.
- (4) Breithneoidh an Coiste Airí an leasú atá beartaithe agus an tuairim a thíolaic Comhdháil na bPáirtithe agus féadfaidh sé an leasú a fhorghnó.
- (5) Maidir le téacs aon leasaithe a d'fhorghnó an Coiste Airí i gcomhréir le mír 4, déanfar é a chur ar aghaidh chuig na páirtithe lena ghlacadh.
- (6) Aon leasú a fhorghnó i gcomhréir le mír 4, tiocfaidh sé i bhfeidhm an 30ú lá tar éis do na Páirtithe uile a chur in iúl don Ardrúnaí gur fhorghnó siad é.

Airteagal 29 — Réiteach díospóidí

I gcás díospóid idir na Páirtithe maidir le léirmhíniú nó cur i bhfeidhm an Choinbhinsiúin seo, féachfaidh na Páirtithe sin leis an díospóid a réiteach trí chaibidlíocht nó trí aon mhodh síochánta eile dá rogha féin, lena n-áirítear trí Chomhdháil na bPáirtithe, dá bhforáiltear in Airteagal 23, mír 2, fómhír e.

Airteagal 30 — Síniú agus teacht i bhfeidhm

- (1) Beidh an Coinbhinsiún seo ar oscailt le go síneoidh Ballstáit Chomhairle na hEorpa é mar aon leis na Stáit nach Ballstáit iad a bhí rannpháirteach ina fhorbairt agus an tAontas Eorpach.
- (2) Tá an Coinbhinsiún seo faoi réir a dhaingnithe, a ghlactha nó a fhorghnó. Déanfar ionstraimí daingniúcháin, glactha nó fhorghnó a thaisceadh le hArdrúnaí Chomhairle na hEorpa.

- (3) Tiocfaidh an Coinbhinsiún seo i bhfeidhm an chéad lá den mhí i ndiaidh deireadh tréimhse 3 mhí tar éis an dáta a léireoidh cúig sínitheoir, lena n-áirítear trí Bhallstát ar a laghad de Chomhairle na hEorpa, go dtoilíonn siad a bheith faoi cheangal ag an gCoinbhinsiún i gcomhréir le mír 2.
- (4) Maidir le haon sínitheoir a chuirfidh in iúl ina dhiaidh sin go dtoilíonn sé a bheith faoi cheangal aige, tiocfaidh an Coinbhinsiún i bhfeidhm an chéad lá den mhí i ndiaidh deireadh tréimhse 3 mhí tar éis an dáta a thaiscfear a ionstraim dhaingniúcháin, ghlactha nó fhormheasa.

Airteagal 31 — Aontachas

- (1) Tar éis don Choinbhinsiún seo teacht i bhfeidhm, féadfaidh Coiste Airí Chomhairle na hEorpa, tar éis dó dul i gcomhairle leis na páirtithe sa Choinbhinsiún seo agus tar éis toiliú gach páirtí díobh a fháil, a iarraidh ar aon Stát nach Ballstát de Chomhairle na hEorpa é agus nach raibh páirteach i ndruchtú an Choinbhinsiúin, aontú don Choinbhinsiún seo trí chinneadh arna ghlacadh ag an tromlach dá bhforáiltear in Airteagal 20.d de Reacht Chomhairle na hEorpa, agus trí vóta d'aon toil ó ionadaithe na bpáirtithe atá i dteideal suí ar an gCoiste Airí.
- (2) Maidir le haon Stát a aontaíonn don Choinbhinsiún, tiocfaidh an Coinbhinsiún i bhfeidhm ar an gcéad lá den mhí i ndiaidh deireadh tréimhse 3 mhí tar éis an dáta a thaiscfear an ionstraim aontachais le hArdrúnaí Chomhairle na hEorpa.

Airteagal 32 — Cur i bhfeidhm críochach

- (1) Féadfaidh aon Stát nó an tAontas Eorpach, tráth an tsínithe nó tráth taiscthe a ionstraime daingniúcháin, glactha, formheasa nó aontachais, an chríoch nó na críocha a shonrú a mbeidh feidhm ag an gCoinbhinsiún seo maidir leo.
- (2) Féadfaidh aon Pháirtí, ar dháta níos déanaí, trí dhearbhu a bheidh dírithe chuig Ardrúnaí Chomhairle na hEorpa, cur i bhfeidhm an Choinbhinsiúin seo a leathnú chuig aon chríoch eile a bheidh sonraithe sa dearbhú. Maidir leis an geríoch sin, tiocfaidh an Coinbhinsiún i bhfeidhm ar an gcéad lá den mhí i ndiaidh deireadh tréimhse 3 mhí tar éis an dáta a gheobhaidh an tArdrúnaí an dearbhú sin.
- (3) Aon dearbhú a dhéanfar faoin dá mhír roimhe seo, féadfar é a tharraingt siar i ndáil le haon chríoch a shonraítear sa dearbhú sin trí fhógra arna dhíriú ar Ardrúnaí Chomhairle na hEorpa. Tiocfaidh an tarraingt siar in éifeacht an chéad lá den mhí i ndiaidh deireadh tréimhse 3 mhí tar éis an dáta a gheobhaidh an tArdrúnaí an fógra sin.

Airteagal 33 — Clásal cónaidhme

- (1) Féadfaidh Stát cónaidhme an ceart a fhorchoimeád oibleagáidí faoin gCoinbhinsiún seo a ghlacadh air féin, i gcomhréir lena phrionsabail bhunúsacha lena rialaítear an caidreamh idir an rialtas láir agus na comhstáit den chónaidhm nó eintitis chríochacha eile den sórt sin, ar choinníoll go mbeidh feidhm ag an gCoinbhinsiún seo maidir le rialtas láir an Stáit cónaidhme.
- (2) Maidir le forálacha an Choinbhinsiúin seo a dtagann a gcur i bhfeidhm faoi dhlínse comhstáit nó eintiteas críochach den chineál sin nach bhfuil sé d'oibleagáid orthu de réir chóras bunreachtúil na cónaidhme bearta reachtacha a ghlacadh, cuirfidh an rialtas cónaidhme údaráis inniúla na gcomhstát sin ar an eolas faoi na forálacha

thuasluaite agus tabharfaidh sé a thuairim fhabhrach, agus spreagfaidh sé iad chun gníomhaíocht iomchuí a dhéanamh chun éifeacht a thabhairt leo.

Airteagal 34 — Forchoimeádais

- (1) Trí fhógra i scríbhinn a bheidh dírithe ar Ardrúnaí Chomhairle na hEorpa, tráth an tsínithe nó tráth taiscthe a ionstraime daingniúcháin, glactha, formheasta nó aontachais, a dhearbhu go mbaineann sé leas as an bhforchoimeádas dá bhforáiltear in Airteagal 33, mír 1.
- (2) Ní fhéadfar aon fhorchoimeádas eile a dhéanamh i leith an Choinbhinsiúin seo.

Airteagal 35 — Séanadh

- (1) Féadfaidh aon Pháirtí, tráth ar bith, an Coinbhinsiún seo a shéanadh trí bhíthin fógra arna dhíriú ar Ardrúnaí Chomhairle na hEorpa.
- (2) Tiocfaidh an séanadh sin in éifeacht an chéad lá den mhí i ndiaidh deireadh tréimhse 3 mhí tar éis an dáta a gheobhaidh an tArdrúnaí an fógra sin.

Airteagal 36 — Fógra

Tabharfaidh Ardrúnaí Chomhairle na hEorpa fógra faoin méid seo a leanas do Bhallstáit Chomhairle na hEorpa, na Stáit nach Ballstáit iad a ghlac páirt i bhforbairt an Choinbhinsiúin seo, an tAontas Eorpach, aon sínitheoir, aon Stát conarthach, aon Pháirtí agus aon Stát eile ar iarradh air aontú don Choinbhinsiún seo:

- (a) aon síniú;
- (b) taisceadh aon ionstraime daingniúcháin, glactha, formheasa nó aontachais;
- (c) aon dáta a thagann an Coinbhinsiún seo i bhfeidhm i gcomhréir le hAirteagal 30, míreanna 3 agus 4, agus Airteagal 31, mír 2;
- (d) aon leasú arna ghlacadh i gcomhréir le hAirteagal 28 agus an dáta a thiocfaidh an leasú sin i bhfeidhm;
- (e) aon dearbhú arna dhéanamh de bhun Airteagal 3, mír 1, fomhír b;
- (f) aon fhorchoimeádas agus aon tarraingt siar forchoimeádais a dhéanfar de bhun Airteagal 34;
- (g) aon séanadh a dhéanfar de bhun Airteagal 35;
- (h) aon ghníomh, dearbhú, fógra nó teachtaireacht eile a bhaineann leis an gCoinbhinsiún seo.

Dá fhianú sin, chuir na daoine a bhfuil a síniú leis seo thíos, agus iad údaraithe go cuí chuige sin, a lámh leis an gComhaontú seo.

Arna dhéanamh i Vilnias, an 5ú lá seo de mhí Mheán Fómhair 2024, i mBéarla agus i bhFraincis, agus comhúdarás ag an dá théacs, in aon chóip amháin a thaiscfear i gcartlann Chomhairle na hEorpa. Tarchuirfidh Ardrúnaí Chomhairle na hEorpa cóipeanna deimhnithe do gach Ballstát de Chomhairle na hEorpa, na Stáit nach Ballstáit iad a ghlac páirt i bhforbairt an Choinbhinsiúin seo, an tAontas Eorpach, agus aon Stát a n-iarrfar air aontú don Choinbhinsiún seo.

IARSCRÍBHINN II

1. DEARBHÚ ÓN AONTAS EORPACH MAIDIR LEIS AN RAON FEIDHME A MHÉID A BHAINNEANN LE GNÍOMHAITHE PRÍOBHÁIDEACHA DE BHUN AIRTEAGAL 3, MÍR 1, FOMHÍR B DEN CHOINBHINSIÚN

Ag meabhrú dó an oibleagáid faoi Airteagal 3, mír 1, fomhír b den Choinbhinsiún chun aghaidh a thabhairt ar rioscaí agus tionchair a eascraíonn as gníomhaíochtaí laistigh de shaolré na gcóras intleachta saorga a dhéanann gníomhaithe príobháideacha a mhéid nach gcumhdaítear i bhfomhír a den fhoráil sin ar bhealach atá i gcomhréir le cuspóir agus críoch an Choinbhinsiúin, dearbhaíonn an tAontas go gcuirfidh sé i bhfeidhm na prionsabail agus na hoibleagáidí a leagtar amach i gCaibidlí II go VI den Choinbhinsiún i leith gníomhaíochtaí gníomhaithe príobháideacha a dhéanann córais intleachta saorga a chur ar an margadh, a chur ar fáil agus a úsáid san Aontas Eorpach trí chur chun feidhme Rialachán (AE) 2024/1689 ó Pharlaimint na hEorpa agus ón gComhairle lena leagtar síos rialacha comhchuibhithe maidir leis an intleacht shaorga ('an Gníomh um an Intleacht Shaorga'). Féadfaidh feidhm a bheith ag *acquis* ábhartha eile de chuid an Aontais freisin maidir leis na gníomhaíochtaí sin agus féadfaidh sin rannchuidiú le cur chun feidhme phrionsabail agus oibleagáidí an Choinbhinsiúin.

2. DEARBHÚ ÓN AONTAS EORPACH MAIDIR LEIS AN RAON FEIDHME CRÍOCHACH DE BHUN AIRTEAGAL 32, MÍR 1 DEN CHOINBHINSIÚN

Maidir le hAirteagal 32, mír 1 den Choinbhinsiún, dearbhaíonn an tAontas go bhfuil feidhm le bheith ag an gCreat-Choinbhinsiún maidir leis an Intleacht Shaorga, Cearta an Duine, an Daonlathas agus an Smacht Reachta, a mhéid a bhaineann le hinniúlacht an Aontais, maidir leis na críocha ina gcuirtear Conarthaí an Aontais i bhfeidhm de bhun Airteagal 52 CAE agus faoi na coinníollacha a leagtar síos, *inter alia*, in Airteagal 355 CFAE.